

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 07.6.2012 18.05 Uhr auf 94.0 bzw. 87,7

Leev Toehörers,

noch ruugweg 24 Stünn dann fangt de Europameisterskupp an. Wor man ok henhört, overall word dorover proot. Dorum will ik an disse Stee ok 'n paar Woorden dorover verlesen. De düütske Nationalmannskupp word ja toetraut, dat se de EM winnen. Man so eenfach word dat na mien Menen neet. Ok anner Lannen, könen Foetballspölen. Wall word over all schreven, dat Düütskland un Spanien de Favoriten sünd, man ik meen, Polen un Holland dürt man neet vergeten. De Düütsken hebben sük in de lesd Spölen ja heel swaar doen. Man de Hollanders hebben Irland mit 6:0 van d' Platz fegt. Hebben se, leev Toehörers, ok tippt? In de Emden Bladd (Emden Zeitung) kann man ja all Spölen tippen un in de Oostfreesen Bladd (Ostfriesen Zeitung) kann man tippen, weffe Spölers in dat Turnier de besten sünd. Un winnen kann man ok 'n heel Bült. Vör Jahren hebb ik maal bi de Emden Bladd mit 'n Kolleg van de Nordseewarken wat wunnen. Man dat was dat dann ok. Ik hebb mi bi de lesd Maalen immer argert, wenn ik de Spölen neet recht tippt harr. Wullte ansük noit mehr mitmaken. Man as dat so is, mi hett dat so in de Fingers jökt, dat ik dit Maal weer bi beid Bladen mitmaakt hebb. Will hopen, dat ik mi neet toe düchtig arger, wenn ik mit mien Tipp dortegen legen hebb.

Saterdag finndt bi Kickers Emden – vör dat Spöl Düütskland tegen Portugal - 'n groot Fan-Foetballturnier statt. 16 Mannskuppen nehmen deel. Ja, sogar 'n Mannskupp ut Braunschweig kummt. Dat geiht um de Emil-Bittner-Pokal. Na de Spölen sall fiert worden – un up 'n Grootbildwand will man toesamen dat eerst Spöl van Düütskland bi de EM bekieken. Ik wünsk völ Spaß!

De 1. Mannskupp van Kickers Emden hett neet spölt. Man de **A-Jögdmannskupp (U19)** hett in de Landesliga mit 3:0 tegen MTV Gifhorn wunnen. Kickers hett dormit best Kansen, Meister toe worden. De Mannskupp liggt blot een Punkt achter Langenhagen. Wenn beid Mannskuppen hör Spölen disse Wekenenn winnen, Kickers mutt na Osterholz-Scharmbeck, dann kummt dat an 16. Juni in Emden toe 'n recht Ennspöl tegen Langenhagen.

Al in de 9. Menüte gung Kickers tegen Gifhorn, dör 'n Tor van **Tido Tuitjer** in Föhren. De Gast kwamm blot of un toe dör – un dann was Kickers Torwart **Karsten Buss** up de Posten. In de 20. Menüte gung **Tido Steffens** allen dör un kunn toe dat 2:0 insketen. In de tweed Halvtied wull Gifhorn dat Spöl noch maal dreihen. Man de Ofwehr um Tido Steffens stunn as 'n Een. In de 86. Menüte skoot Tido Tuitjer dann dat 2:0 för Kickers. Dat Spöl was lopen.

De **B-Jögd-Mannskupp (U17)** van Kickers Emden verlor, nadem Trainer Torsten Hoppe toerügg treden is, wall mit 0:1 in Osnabrück, man se hett 'n goed Spöl maakt. Janek Grünebast harr al in de 3. Menüte dat 1:0 för Kickers up de Foet, man sien Skoet gung knapp an 't Tor vörbi. VLF Osnabrück was wall overlegen, man de Kickersspölers gleken dat dör völ Lopen ut. Man na 'n Ecke in de 74. Menüte was dat dann sowiet. Dominik Thomas skoot dat Tor för Osnabrück. De Jungs könt aber wieder hopen, dat se in de Neddersassenliga blieven.

In de **C-Junioren-Landesliga (U15)** spölten de Jungs van Kickers Emden tegen JFV Jever 3:3. Se laggen al mit 1:3 toerügg. Hebben sük dann aber noch uprappelt un noch 2 Toren skoten. Mit spölten: Alexander Bartels (36.Minute Djamel Amroun), Matthias Hanssen, Timo

Artmann, Philipp Menke, Julian Stöhr, Lars Lautenbach, Benjamin Neziraij, Yannis Hiahemzizou, Nils Frerichs, Pasquale Gerjets, Florian Harberts, Tido Janssen. Hanno Poppen.
De Toren för Kickers skoten: 1:1 Tido Janssen (16. Menüte), 2:3 Pasquale Gerjets (41.), 3:3 Tido Janssen (50.).

So, nu as alltied, noch ´n kört Foetballwitz.

Twée Kickersfans treffen sük:

„Du, mien Frau will sük skeden laten, wenn ik elke EM-Foetballspöl in d` Kiekkast (Fernsehen) sehn will.“

„Dat is ja würrrelk spietelk.“

„Ja, dat is wall so, se deit mi seker leep fehlen.“

So, leev Toehörers van Radio Oostfreesland,

ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.